



wantok

NESENEL

Niuspepa bilong ol Papua Niugini stret

Namba 235

Bilong wik i stat long Sarere, 9 Septemba 1978

Prais 10t.



Turis Dipatmen Poto.

WELKAM LONG PAPUA

Dispela poto i soim ol deliget bilong 18 Lokal Gayman Kaunsil. Sampela i presiden. Waitman i sanap bihain long ol em i Mista John G. Nilan (Lae) em i menesa bilong Loka Gayman Asosiesen Ejeni. em mipela i toktok long en long stori long pes 3.

Kirap long lephan daunbilo, yumi lukim Malcolm Bonga (Noten) Herman Beri (Is Sepik), Rima Nau (wanpela seketeri), Porpor Haral (Manus), Undi Nandi (Saten Hailans).

Ol man i sanap em hia: Kombra Kelyer (Westen Hailans), Ope Oeake (Galp), John Nilan (Lae), Lebasi Mark (Milne Bay), Dibura Moiba (Westen), Nogai Kora (Simbu), Dick Lanzarote (Nu Ailan), Wagera Kenu (Wes Sepik), Bato Bultin (Madang), Russel Waibari (namba tu distrik komisina bilong Sentral Provins).



Poto i soim. Kadinal Albino Luciani taim em i putim klos bilong Pop nambawan taim na i kamaut long rum bilong vona i tok na givim blesing bilong em lon ol pipel. Nau em i Pop Jon Pol.

Poto i kam long Australian niuspepa.



POP JON POL

(i kam long pes 3)

Ol man i save long dispela Pop Jon Pol tok se, em i olsem gutpela papa tru. Em no pes tudak. Nogat. Em i save lap, na laik stori. Em i gat planti save, tasol em sarap planti tu. Na em i laik sindaun ha im tok na wari bilong ol arapela man. Tasol sapos em i gat tok, em i save auti kli tru. Dispela pasin em i lainim biko em i bin wok olsem niusman na ripotaim em i yangpela man. Em i laikim kli pela tingting. Na em i laik bai ol pipel autim tingting bilong ol.

Bikos dispela kadinal em i no bin sta longtaim long Rom na i no bin wok insa long bikpela gavman bilong Katolik Sias. I planti man i pilim em i fri, na i no mas t hainim laik bilong ol opisa bilong Sias. I i no save tru em bai tok o mekim waner. Em yet i tokaut olsem: "Mi pret; mi g bikpela wok; na God i mas helpim mi."

Ating em bai helpim tu bai ol arape Kristen Sias i ken bung wok gut wantair. Long pasin bilong bipo taim ol Katolik mekim seremoni bilong makim Pop, o putim hat bilong king antap long het i long em na em i mas sindaun antap los wanpela sia king. Dispela samting Pop Jon Pol i tambuim ol long mekim long er. Ating dispela kain tingting na laik i givi wanpela aidia bilong wanpela gutpela man i bihain pasin bilong Jisas yet na i la kamap wokboi bilong olgeta pipel. Na em i no laik ol i wokboi bilong em.



WANBEL

Long olgeta hap bilong PNG, ol Provins i wok hat long sanapim Provinsal Gavman bilong ol wan wan. Tru, sampela hevi bilong sanapim Provinsal Gavman i wankain long olgeta hap long PNG. Tasol sampela i no wankain.

Olgeta Provins i no gat wankain strong long kamapim mani bilong ol yet, na gutpela wokman, na strongpela ol Lida.

Yumi mas save long wanpela bikpela samting. Strong bilong mani tasol i no inap kirapim Provins. Strong bilong saveman tasol, ol save bilong wok tasol i no inap kirapim Provins.

Olgeta hap bilong wol, na tu long PNG ol Lida, saveman na wokman i pilim dispela hevi.

Yumi mas i gat save bilong wok na PASIN tu WANTAIM. Gutpela pasin em i stia tru bilong ol Lida na ol wokman. Sapos i no gat gutpela pasin bai kaikai bilong wok bilong yumi bai i no inap kamap.

Maski hatwok bilong yumi long kamapim gutpela plen, o maski hamas wokman, o saveman, o maski hamas mani yumi i gat, wok bilong yumi bai i no inap sut long mak tru long kirapim Provins bilong yumi. Sapos yumi kamapim gutpela pasin bilong wanbel na wok bung wantaim, bai yumi inap stiaim gut provins bilong yumi.

Wanbel na wok bung namel long ol Lida na wokman bilong Gavman na wanbel namel long Gavman na pipel, em i wanpela bikpela samting. Insait long Nesenel Gavman, ol i hat wok yet long kamapim pasin bilong wanbel na wok bung.

Sampela taim ol lida i bagarapim wok bilong ol wokman. Na sampela taim ol wokman i bagarapim ol lida. Sampela taim Gavman tu i save bagarapim pipel. Na tu, long sampela taim pipel i save bagarapim ol Lida nating.

Tasol sapos yumi bilip tru long kirapim ples na divelopim kantri, orait PASIN bilong wanbel na wok bung i olsem wanpela stia na mak bilong wok bilong yumi.

Long dispela kibung, yumi i kam long painim rot long yumi i ken skelim tingting na save bilong yumi, na tu wanbel na kirapim pasin bilong wok bung long kirapim Morobe Provins.

Yumi i gat planti moa wok long mekim. Na bikpela wok bilong kirapim Provinsal Gavman i stap yet. YUMI i stat nau tasol.

Utula Samana, Provinsal Plena bilong Morobe i bin givim dispela toktok long Gurakor Bus Kibung.

Ol lokal gavman kaunsil

Long tupela las de bilong mun Ogas i gat wanpela kibung bilong ol deliget bilong 18 lokal gavman kaunsil bilong PNG. Ol i bin kibung long bikopis bilong Port Moresby Siti Kaunsil. Ol i save kibung olsem olgeta yia. Mista Gai Duambane, man bilong bosim dispela hap bilong dipatmen bilong ol provins, i bin givim toktok long ples bilong hetman bilong dipatmen, Pater John Momis.

Em i bin tokim ol kaunsila, nau i gat tripela leta bilong gavman. Antap tru em i nesenel gavman - em i bosim kantri olgeta. Provinsal gavman - em i aninit long en na i kamdaun moa klostu long pipel bilong provins. Tasol lain i stap namel tru long ol pipel na i bringim tok bilong gavman long ol na i larim ol i kam insait na holim sampela pawa bilong gavman, em ol lokal gavman kaunsil tasol.

Long wan wan provins nau ol i traim kain kain we bilong larim lokal gavman kaunsil i ran. Ol i bin mekim narakain long Is Nu Briten na Not Solomons na gavman i lukim pasin bilong ol. Em i ran gut o?

Ol lokal gavman kaunsil i

bin brukim bus na go pas tru long bringim aidia bilong vot na bilong demokrasi na bilong tilim pawa na putim long han bilong ol pipel. Ol i bin stat long yia 1951. Long lokal gavman kaunsil yet ol man bilong as ples i bin skul long pasin bilong ranim kibung, bilong paitim tok, bilong vot. Long lokal gavman kaunsil ol i ken harim tok bilong ol pipel bilong ol ples klostu. Na ol pipel i ken pilim ol inap long putim sampela aidia bilong ol insait long gavman tu. Planti kaunsil moa i bin ran gut tru tru na inap planti yia moa. Sampela tu i bin pundaun.

Ol kaunsil i wok long hap bilong kantri we planti pipel moa i stap: em long

ol viles. Strong bilong kantri i stap long ol viles pipel na olsem ol kaunsil i ken mekim bikpela wok long ol as ples nabaut long ol yet. Ol i ken mekim mobeta olsem gavman long Moresby, long wanem ol i stap klostu tru long ol pipel bilong ples.

Ol kaunsila i mas helpim tru long stretim olkain wari long ples, bai ol pipel i no laik ranawe i go long ol taun, tasol ol i belgut long sindaun mekim wok long ples. Ol kaunsil i mas lukaut bai ol as ples pipel i gat gutpela ples bilong sindaun, i gat gutpela skul long ol pikinini bilong ol, i gat wok long winim wan siling bilong ol. Ol i mas gat rot na trasport tu na gutpela helt sevis.

(i go moa long pes 20)

Nupela Pop Jon Pol

Long de namba 26 bilong Ogas, long apinun tru long biktaun Rom long Itali, samting olsem 110 kadinal bilong Katolik Sios i bin ilektim nupela pop bilong helpim Pop Pol, em indai pinis tupela wik bipo. Nupela pop em i Kadinal Albino Luciani bilong biktaun Venis long Itali. Em i gat 65 kristmas na i kisim nupela nem Pop Jon Pol. Em i olsem em i bungim nem bilong tupela pop i bin go pas long em.

Ol kadinal i bin stap kalabus long wanpela spesel rum bilong vot inap long 9 aua samting. Na ol i bin vot 4-pela taim, na dispela Kadinal Luciani i win. Ausait i no gat sampela man i bin makim em olsem man inap long winim dispela bikpela ileksen.

Bihain long wan aua samting, em i kam ausait long wanpela bikpela veranda long bikpela haus lotu bilong Pop long Rom, na em i givim liklik toktok na blesing namba wan taim long samting olsem 20,000 manmeri i sambai wetim dispela nius. Na nupela pop i bin toktok tu long televisen na planti manmeri bilong olgeta kantri i bin lukim em olsem. (Televisen em i olsem wanpela radio i soim piksa wantaim toktok - olsem wanpela muvi. Na planti bikpela kantri i gat dispela kain samting long ol haus - olsem yumi gat radio.)

Mama i bin karim Pop

Jon Pol long yia 1912 long wanpela taun long not bilong kantri Itali, nem bilong em Forno di Canale. Papa bilong em i wokman nating, i save mekim wok wantaim simen na brik. Albino i skul long pris na bihain i kam bek wok olsem pasto long as ples bilong em stret. Em i winim yunivesiti long Rom, na inap 10 yia em i tis long semineri i, no longwe long biktaun Venis.

Em i Kisim namba bilong bisop long yia 1958 na i bosim wanpela smolpeta daiosis klostu long Venis inap 11 yia olgeta. Long dispela taim em i bin autim sampela tingting bilong

em. Em i skulim ol pris long salim ol planti bilas gol i stap insait long ol haus lotu bilong ol na givim mani long helpim ol man i hangre na i rabis. Em i man bilong tingting planti na wari na marimari long ol rabisman.

Pop Pol i bin makim em kadinal bilong biktaun Venis long 1973 tasol. Venis em i narakain biktaun tru. I no gat ol rot na strit long en. I gat ol han wara tasol na ol manmeri i wokabaut long bot na longpela kanu tasol. I gat planti bikpela haus, tasol i no gat ka, long wanem i no gat rot. Ol bot na wara tasol.

(i go moa long pes 2)

RAITIM NEM INSAIT LONG BAS

Dia Edita - Mi wanpela man long ol planti man i save ron long Bas i go i kam long Wewak Taun. Tasol wanpela samting mi bin lukim long bas na mi pilim i no stret long mi. Na mi ting olsem i no stret tu long sampela arapela pipel tu.

Dispela em mi save lukim ol nem bilong ol man-meri ol i save raitim long baksait bilong sit long bas. Na tu long banis na long ol sait bilong bas. Dispela ol nem em planti nem bilong ol skul pikinini long Yarapos, Brandi na sampela ol nem bilong ol nes long Boram Haus sik.

Susa na brata mi ting olsem yu so ov long save o long skul bilong yu na yu raitim nem bilong yu wantaim nem bilong skul bilong yu insait long bas. Yu ting yu raitim nem bilong yu long bas. Na sampela manmeri ol i lukim nem bilong yu na ol i rait pas long yu o olsem wanem? Nating yu laik pilai tasol long raitim nem bilong yu long bas. Na ol wantok bilong yu i ken lukim nem bilong yu, laka!

Yes ol wantok. Bas i no pilai samting bilong yu long wokim rabis pasin bilong yu long raitim nem bilong yu long em. Yu no ken makim bas olsem yu makim ol samting long diwai o makim kaving long ples bilong yu. Dispela em wanpela rabis pasin tru long raitim nem long bas. Na makim kain kain samting nogut long em.

G.P. Taigwen,
Wewak.

BRUKIM BOTOL

Dia Edita - Mi salim dispela pas i kam long yu bikos mi no amamas long ol man i save brukim ol botol taim ol i dringim wara bilong em pinis. I gutpela long kisim botol i go long haus taim yu dring pinis. Dispela kain pasin i nogut bikos ol pipel inap long katim leg bilong ol.

Na sapos yupela i no laik karim i go long haus, orait

tromoi long rabis dram. Botol tu em i hap bisnis, yu ken mekim mani. Ol siti kaunsil ol i no save lukluk gut. Ol man na meri save brukbrukim botol long rot na long bus.

Em tasol liklik wari bilong mi.

Nicholas Towai,
Buin/N.S.P.

LIDASIP LO

Dia Edita - Dispela em liklik tingting bilong mi long lo bilong ol lida. Dispela tingting bilong Mista Michael Somare na Pater John Momis long ol lida i mas no ken mekim wok politik wantaim wok bisnis. Dispela em i stret olgeta long tingting laik bilong mipela ol pipel.

Sapos wanpela lida i mekim wok bilong politik wantaim wok bilong bisnis wantaim gavman. Bai em i no inap wok gut long gavman. Mi laik soim wanpela eksampel. Mipela ol pipel bilong Nawae Open Iektoret. Mipela i votim 3-pela man olsem memba bilong mipela long las Palamen Haus. Ol dispela 3-pela memba ya i no mekim wanpela wok kamap bilong gavman long ilektoret bilong mipela na 5 yia i go nating.

Long wanem ol dispela 3-pela man hia ol i politik man. Ol i no save wokabaut long bandri o mak bilong mipela na kisim tingting na wari bilong mipela na i go soim long Gavman.

Nogat tru. Ol i stap tasol long ples we ol i stap long en na mekim wok bisnis bilong ol. Olsem na long tingting bilong mipela ol pipel. Gavman i ken putim dispela lo strong.

Sapos wanpela lida o memba i laik mekim wok bisnis. Em i mas pinis long wok gavman o i mas wet long narapela ieksen i kamap. Tarangu mipela pipel i kisim tuhat na sakin san na ren long votim ol i kamap memba bilong mipela na ol i go i kam long miting bilong palamen. Na kisim bikipela mani. Tasol ol i no save raun long banri mak o long ples bilong mipela na lukim hevi mipela i gat.

Nogat. Ol i stap tasol

long taun na mekim wok bisnis o bilong ol dispela pasin ol i mekim i no gutpela long tingting bilong mipela ol pipel. Gavman i ken putim dispela lo i stap strong long wanpela lida i no ken mekim wok politik na wok bisnis tu wantaim gavman.

Tatip Tuwab,
Lae.

Salim ol pas
i kam long:

WANTOK
BOX 1982
BOROKO

MERI NO ABUS

Dia Edita - Plis givim mi liklik spes long putim hap liklik toktok long Wantok. Mi laik givim namba wan sapot long brata ya Thomas K.K. Namta bilong Isten Hailens. Em i tok "Meri No Abus". Mi amamas tru long ritim pas bilong yu. Em i tru ol planti man save tok long ol meri i abus bilong ol.

Mi pilim ating i kamap long as bilong rokrok o kakaruk man i karim em. Sapos meri i karim em bai em i gat sampela rispek long ol meri na i no ken mekim kain toktok olsem. Na tu man i tok olsem, ating em i no kristenman.

Em ating wanpela long-long haiden man no gat bilip long God. Sapos em i kristenman, em mas save olsem mama bilong Jisas, "Maria" em wanpela namba wan meri long yumi olgeta meri. Mipela ol meri i traim long bihainim eksampel bilong em.

I no olgeta man long PNG save tok "abus" long ol meri. Yu husat save tok olsem; ating brata, mobeta yu sindaun na tingting gut. Ating seten save bosim yu olgeta ya olsem na yu no inap long lus tingting long em. Mi sori long yu brata. Long wanem man nogut i bosim laip bilong yu. Tenkyu long Thomas long gutpela pas bilong yu. No gat planti man long PNG i gat wan-kain tingting olsem brata ya Thomas K.K. Namta.

A. Kami,
Mt. Hagen.

HELPIM PLISMAN

Dia Edita - Inap yupela i ken larim liklik spes long mi, bai mi putim wari na askim bilong mi long en. Wari bilong mi i go olsem. Mi lukim pas bilong wantok ya em long Rakano Rubben bilong Mt Hagen. Em i rait na i toktok long ol marit plisman. Namba wan toktok bilong em i olsem. Ol plisman ol i lo meka na ol i mas bihainim ol lo.

Mi tokim yu R. Rubben, i no gat wanpela man long graun i no save mekim rong. Olgeta man long graun em ol bilong wokim rong tasol. Wanpela man tasol yumi save long em. Em i no save wokim rong. Mi no inap kolim nem bilong em long yu. Yu yet painim long yu yet na askim yu yet.

Ol tarangu ol plisman ol bilong lukautim ol lo tasol. Ol i no save wokim lo. Ol man long palamen, em ol man bilong wokim ol lo. Narapela toktok bilong yu, yu tok ol marit plisman i save lusim ol meri bilong ol long haus na ol i save go grisim ol meri nabaut na kisim ol pamuk meri nabaut. Bihain kam bek pait i kamap.

Yes Rubben. Dispela kain em i no bilong ol marit plisman tasol, bilong olgeta maritmanmeri long PNG. Na tu ol narapela tu, ol manmeri marit i save kros na pait. Mi askim yu, yu marit o singel? Sapos yu singel yu lukaut, taim yu marit. Em bai het o wanpela hap mit bilong yu bai i lus. Long wanem yupela ol hailans yupela ol man bilong pait long tamiok, banara, spia na stik. Em sapos yu go raun na kambek long haus, em bai meri bilong yu bai kisim ol dispela samting mi kolim ol, bai i putim antap long yu nau em bai yu krai na ran.

Yu save long bikipela graun bilong yumi i gat ol kain kain man na meri o marit. Sampela meri marit ol i save lusim man bilong ol i go raun na sampela meri i marit i no gat ol i no laik bai man bilong ol i go raun nabaut. Sapos man i go stap wantaim ol poroman wantok o wanwok

bilong em longpela tain na em i kam bek long haus. Em bai meri bilong em i tok em i go painim meri na em i kam bek o sampela taim bai meri bi long em bai i kolim natin, nem bilong wanpela mer long man bilong em. Dispela kain ol marit i save pait long en.

Sapos yu bel hevi long dispela leta o plisman yu go dringim solwara. (baim wanpela bek sol long stua na yu kaikaim bai be bilong yu i kol.

Em tasol. Sapos yu ga wanem tingting long dispela, orait, rait tasol long Wantok bai mi lukim.

Mapia Gori
Panguna/N.S.

RAUSIM STING LONG KANTRI

Dia Edita - Mi gat war pela wari bilong mi long kantri bilong yumi Papu Niugini. Mipela i wok long mekim kantri i bagarap tr long ai bilong bikipela pap bilong yumi i stap long heven.

Planti manmeri i no tingim God long heven na ol wok long dring bia, mekim pasin pamuk, kilim ma stil nabaut na planti ar pela samting we ol i meim i sting tru long kant bilong yumi. Na ol dispe samting i sting tru long bilong bikipela long heven.

Plis ol wantok yumitrai kamap wanpela kriste kantri. Sapos yumi meki olsem papa bilong yur long heven i ken blesi kantri na i ken lukauti yumi wantaim kantri t long yumi.

Sapos yumi bagarapi kantri na mekim sting lor kain kain rabis pasin. E bai husat inap helpi yumi na kantri bilong yumi. Taim bilong woa pait samting i kamap lor kantri bilong yumi. Plis wantok traim na meki kantri bilong yumi i kany olsem kristen kantri.

Em tasol ol wari bilong mi na husat man o meri gat bel hevi long dispel Yu mas rait i go long Wa tok Niuspepa.

Martin Wapir
Margarima/S.H.

Madang taun kausil kibung tok olsem

PASINDIA PE LONG OL SIP

Siaman i tok welkam long Mista Fenski, em jeneral menesa bilong ol Luteran sip i save karim ol pasindia i go i kam.

Klak bilong taun i autim sampela wari long Mista Fenski. Ol dispela wari i kam long sampela pasindia bin stap long ol sip bilong kampani bilong em, na ol i komplén olsem, ol i bin jaim rot tasol ol i no save kisim kaikai long rot na ol i no inap hait sampela taim long ren na ol i no ken yusim ol toilet.

Mista Fenski i tokim Kausil olsem: Luteran Misin i save ranim 5-pela ip. Em hia MV Totol, Jimbang, Sungu, Daniel, na Junial. Ol i save ran i go ong Madang, Lae, Wewak, Vanimo, Rabaul, na Simbe - na tu i save go inait long sampela smolpela basis. Pe bilong sip em nap long baim rot tasol na kaikai nogat. Long MV Totol tasol ol pasindia i jaim kebin na kaikai. Olaim i gat wanpela stua ong sip na ol pasindia inap ong baim kaikai hia. Na olgeta sip i gat toilet na olgeta pasindia i ken yusim.

Kausila Sasa Bass i tok-na kausil olsem: samela taim ol boskru i ambuim ol pasindia long usim ol dispela toilet na olsem ol i komplén. Tasol lista Fenski i tok, em i no in save long dispela samting. Tasol em bai stretim ol long en.

OL SKWATA ONG MADANG

Mista Brady i bin tok iwe long kausil olsem: Madang Skwata Setelmen ot i bin stat, long wanem, Minista bilong bosim ol zus, em Mista Thomas Savali, i laikim olsem Bot a i mas lukaut bai ol setelmen i gat wara bilong ol pipel na lektrik pawa na sampela han rot, na toilet a ol trak i mas raun kisim

pipia bilong ples.

Dispela Bot i tok, ol pipel bilong Biliau Viles i kros long ol setelmen i kirap long graun bilong ol, we ol gaden bilong ol i stap. Tasol gavman i bin baim dispela graun long ol Biliau long yia 1972 long \$32,000.


KLINIM TAUN

Siaman Kausila Kaukesa Kamo i tok, olgeta kausila i mas kam wantaim em long wanpela de na givim gutpela eksampel long pasin bilong klinim taun na bungim olgeta rabis na pipia na tromoim i go long ol dram. Ol i mas makim wanpela de bilong dispela na olgeta wokman bilong opis bilong ol i mas poromanim ol kausila na go na givim dispela gutpela eksampel long ol pipel. Long wanem nau ol pipel i save tromoim ol pipia nabaut nabaut.

NUPELA WE BILONG BUNGIM OL TAKIS

Taun Kuskus i bin autim wari bilong em long kausil i tok, ol i hat wok tru long bungim takis long ol pipel. Olsem ol i laik painim sampela nupela rot bilong mekim dispela wok. Em i bin tok, bipo ol i bin askim tok orait long Nesenel Gavman long mekim wanpela nupela pasin, em long putim hevi long olgeta woksap na faktori na bosman, ol yet i mas tekewe takis mani long pe bilong wan wan wokman bilong ol long Madang, na salim dispela mani i kam long kausil opis.

Kausila Galen Lang i tok: dispela aidia i orait liklik. Tasol sapos em i olsem, bai olgeta skwata na man i no wok long kampani samting, bai ol i no mas baim takis olgeta. Na sapos i olsem, bai i no stret, long wanem ol dispela pipel bai kisim fri wara na rot na kain samting olsem - na ol man i gat wok i mas baim long ol.



Poto antap i soim naispela taun bilong Madang. Em i nambawan pasis tru.

Vanimo lokal gavman kausil

DOKTA STAPIM SUT LONG OL ET POS

Kausila Abus i askim dokta, bilong wanem na em i stapim sut long ol et pos? Dokta i tok, ol et pos odeli inap givim sut. Tasol ol medikal et i no inap long givim sut. Long wanem ol i kisim trening bilong ol inap long 3-pela mun tasol na i no inap. Et Pos Odeli ol i kisim trening bilong ol inap long 2-pela yia, em i orait.

Kausila Patrick i tok, inap Dokta i ken givim sampela kos long ol medikal et? I mas raitim gut dispela. Dispela samting em i marasin na mipela i no inap go egens long Dokta.

WOK KAKARUK

Michael Kangwano intordusim o tok save long ol kausila long tripela bikman bilong DPI. Em ol long Mista Sumpe bilong Vanimo yet, Mista Hulo na Mista Abdelsamie tupela bilong Lae. Mista Abdelsamie i toktok long we bilong lukautim kakaruk, kiau bilong em na pato. Em i tok dispela i gutpela bisnis bilong pipel long ples. Sapos ol pipel i gat

laik long statim dispela bisnis ol i ken salim tok long em long Lae na em bai salim ol kakaruk na pato i kam.

Siaman i tenkim em long gutpela toktok bilong em na tok bai ol kausil i go long ples na tok save long pipel bilong ol.

PAM WARA LONG WUTUNG VILES

Kausila Feni i tok dispela samting mi putim long miting long las yia na mi no harim sampela samting i kam bek long en.

Mista Tony i tok pam i kam pinis tasol no gat man bilong wok. Long stretim dispela samting Kausil i ken salim wanpela man i go kisim trening long fiks- im ol pam wara long Popondetta.

OL WELFE OPISA I NO RAUN LONG PATROL

Kausila Abus i tok i no gat wanpela man long dispela lain i bin goaut long patrol inap nau. Mi bin kamap tupela taim long welfe opis na ol i no wokim wanpela samting.

Kausil Mayo i tok, Mi sapatim tok bilong Kausila Abus. Mobeta kisim ol yangpela opisa i kam na senisim olpela opisa.

Kausila Patrick i tok, i gat sikis mun i gutpela long ol i goaut long patrol. Sapos ol i no goaut, em i les bilong ol tasol. Salim wanpela i go long wokim wanpela patrol nau.

Kausila Kaiyo askim Siaman ol welfe bai stap tasol long taun o go long ol ples tu. Siaman i tok bilong ol welfe i mas go raun long ol ples o viles tu.

JAYAPURA LIMLIMBUR

Kausila Mayo i tok ol pipel bilong Puare i laik save gut long wanem tru na kausil i go long dispela limlimbur. Ol i laik save long mani i kam we tru.

Siaman i tok, mi tok pinis long las miting. Mani i kam long Nesenel Gavman. Yupela ol kausila mas kliaim gut tingting bilong ol pipel bilong yupela.



Strong Tru.

HUSKY DYNA

Niupela trak bilong Toyota i save wok hat tru.
Yu laik karim kago o pasindia – long biktaun
o rot nogut long bus – dispela trak em inap.

TOYOTA

BRANCHES AT: PORT MORESBY 25 4088 LAE 42 2322 MT. HAGEN 52 1888

ELA MOTORS LIMITED

MADANG 82 2188

RABAUL 92 1988

KIETA 95 6083

WEWAK 86 2255

GSP ET 013P

THE INVESTMENT CORPORATION OF PAPUA NEW GUINEA



SAPOS YU SMAT, YU BAIM SEA LONG INVESMEN
KOPORESEN BILONG PAPUA NIUGINI

Bai yu kisim winmani bilong planti kampani wantaim.

Sapos yu laik save moa, o yu laik kisim fri wanpela kala buk i soim wok
bilong mipela, yu rait long: Investment Corporation
P.O. Box 155
Port Moresby

Nem bilong yu:

Adres bilong yu:



SKON WANTAIM PAMKEN

Yu mas bungim:

- 1-pela kap pamken yu kukim pinis
- 1-pela bikpela spun marjarin
- 2-pela bikpela spun suga
- 1-pela kiau (sapos i no gat, maski)
- 2-pela kap plaua
- 3-pela smolpela spun bekpaura
- liklik hap sol
- 1-pela kap susu

Yu mekim olsem nau:

Pastaim yu mas kukim pamken na wilwilim o brukbrukim. Long wanpela plet yu pait wantaim ol dispela samting: marjarin, kiau, suga. Redi pinis, orait nau putim pamken insait na paitim. Nau yu kapsaitim plaua na sol na bekpaura na susu - na paitim paitim olgeta samting wantaim bai kamap malumalu na redi. Nau yu redim wanpela plet ain, givim, na kapsaitim liklik liklik hap samting ya i redi long kukim skon. Putim long aven inap em i tan. Sapos yu no gat plet ain, praipan tu i orait.

Poto antap i soim wanpela meri long haus kaikai long Goroka. Ol bisnismeri bilong Isten Hailans i ranim dispela stua.

TAIM MAMA I GAT BEL EM I MAS KISIM KAIKAI LONG 3-PELA LAIN KAIKAI OLSEM:

- 1) Kaikai bilong wok: em olsem taro, kaukau, yam, rais, kokonas, sayor.
- 2) Kaikai bilong kamapim bodi: olsem pis, kiau, pinat, bin, mit
- 3) Kaikai bilong lukautim bodi: olsem kumu, kon, painap, papa, banana.

Kumu em i wanpela gutpela kaikai long ol mama i gat bel. Kumu i save helpim yu long wokim nupela blut. Mama i gat bel i mas wokim gris long kokonas long kukim kaikai o kumu.



Misis

Waliyato Clowes

(Memba bilong Midel Flai Open)

Misis Waliyato Clowes em i namba tu memba meri i kamap memba bilong palamen. Em i gat 27 krismas. Mama i bin karim em long yia 1951 long Dadi viles, klostu long Balimo, long Westen Provins. Em i marit na i gat wanpela pikinini man na wanpela pikinini meri.

Em i bin skul long Awaba Misin praimer skul; na bihain em i go long Awaba Misin Haiskul na i winim fom 1 na 2. Long 1967 em i stap long Awaba Misin Tisa Koles inap wan yia na i kamap tisa. Tis, em i wok tru bilong em.

Bihain em i tis inap 2-pela yia pinis, em i go bek skul moa. Orait, nau em i wok long tis inap 6-pela yia olgeta.

Em i risain long yia 1976 bikos ol pipel i laik em i go makim ol long palamen. Orait, ol pipel i votim em na em i winim ileksen.

Inap nau em i bin lukluk raun tasol long Amerika. Gavman bilong Amerika i bin baim rot bilong em bai em i ken go na lukim pasin bilong ol Amerika long ranim gavman bilong ol. Na tu em i go long sampela hap long Amerika i gat tais na graun malumalu - olsem long as ples bilong em yet. Em i lukim olsem wanem ol pipel long Amerika i bin wokim kain kain baret long mekim wara i ranawe na drai graun i kamap. Wanpela samting em i lukim tu: ol pasin bilong mekim ol riva i daun moa. Misis Clowes i wari bikos Flai Riva long ilektoret bilong em i no daun inap, na olsem ol bikpela sip i no inap go antap na bringim kago i go i kam.



EVINRUDE

NAMBAWAN AUTOBOT MOTO

6H.P 15H.P 25H.P 35H.P

PLANTI SPEA PAT I STAP

PRAIS I DAUNBILO NAU

BAIM TUDE LONG


BOROKO MOTORS

And Subdealers




Aveling Barford Pacific Pty. Ltd.
Representing the world's
leading automotive manufacturers.

Ume St. Gordon, Port Moresby. Phone 257166, 257908
Morobe Ave. Lae. Phone 424188, Mt. Hagen. Phone 521015
Stones Automotive Services, Kieta. Phone 956093
Malaguna Motors, Rabaul. Phone 921751




RYCO-FLEX

Hydraulic hose, assemblies,
couplings, adaptors.



NACHI

Bearings—automotive industrial
machinery. Roller, ball, taper bearings.
Extra small radial ball bearings.
Single row deep-groove ball bearings.
Double-row self-aligning ball bearings.
Tapered roller-bearings.
Cylindrical roller-bearings.



SAPOS MARASIN I KUKIM BEL


I gat planti kain kain marasin samting i no bilong dring. Olsem ol strongpela samting yumi save yusim nabaut long wok, olsem bensin o kerosin. Sampela tu i paura olsem mama i save yusim bilong klinim plua o paura bilong klinim toilet o paura bilong rausim strongpela mak i stap long klos o long tebol samting.

Sapos man o meri o pikinini i no lukim gut, o i no save na em i dringim dispela samting, bai em i paia tru long maus na nek na bel na i kukim tru skin bilong maus na nek na bel.

I gat wanpela bikpela tambu long helpim kain man olsem. YU NO KEN MEKIM EM I TRAUTIM BEK DISPELA SAMTING. Nogut em i paia wantaim moa.

YU MEKIM OLSEM:

- (a) Yu givim planti wara long em long dring
- (b) Yu givim planti susu long em long dring
- (c) Kisim sampela nupela kiau, brukim, na larim man i dringim
- (d) Tanim plaua wantaim wara na em i ken dringim o kaikai



Katim dispela lesen na holim i stap. Bihain yu ken wokim buk long en. Planti moa bai kamap.

TOM PIPER MIT i klostu moa, i gutpela tru



Sapos yu laikim kaikai i swit moa na i redi hariap tru, baim wanpela tin Tom Piper mit. Sapos stua i klostu, Tom Piper tu i klostu.

Ami wokim senta

Long de namba 26 bilong Ogas, hetman bilong Difens Fos, em Brigadia Jeneral Ted Diro, i bin opim wanpela nupela komyuniti senta bilong Katolik Misin long Yule Ailan long Sentral Provins.

Ami i bin givim ol kamdaman na plama na ensinia na man bilong taitim ol lektrik waia na ol i sanapim dispela bikpela senta bai bikpela haiskul bilong misin i ken yusim olsem ples kibung bilong ol, na ol pipel i stap nabaut long ol viles klostu ol tu i ken yusim olsem ples kibung na bilong soim muvi na kain samting olsem. Ol Sista bilong lain OLSH i bin lusim K40,000 long baim ol simen na timba na ain samting bilong wokim dispela senta. Ami i givim fri ol wokman bilong em na ol wokman bilong em na ol trasport.

Ol i bin statim tru dispela wok long yia 1977 taim ol ensinia bilong ami yet i droim olkain plen bilong wokim dispela senta o haus kibung. Orait, long mun Septemba long yia i go pinis ol i bungim olgeta diwai samting bilong kirapim wok, na ol i pulimapim long wanpela bot, nem bilong em Julie Ross. Tasol dispela bot i painim birua na i kapsait na olgeta samting i lus long solwara. Na 6-pela pipel tu i dai pinis long dispela taim.

Orait, long dispela yia long mun Me ol i kirapim bek dispela wok. Dispela taim ami i bin yusim wanpela bikpela pang bilong em, nem bilong em Buna. Tasol dispela pang i no inap kam sua long Yule Ailan, olsem na em i tromoim olgeta kago long bris. Kago ya inap long 90 tan na planti handet skulmeri i bin karim olgeta i go wan mail samting, inap long misin stesin.



Ol skulmeri i bin mekim bikpela wok tu long stretim graun bilong wokim dispela senta, na ol i bin wok long karim karanas i kam, na miksik simen, na karim i go.

Dispela huas kibung i longpela inap long 30 mita, na braitpela bilong em inap long 11 mita samting. Inap long 500 manmeri i ken go insait.

Taim Brigadia Jeneral Diro i tok amamas long dispela wok bilong helpim ol pipel long ples, em i tok, dispela em i namba tu wok bilong ami. Nambawan, em i wok soldia.

Minista bilong Difens, Mista Louis Mona, na memba bilong Kairuku-Hiri, Mista Joseph Aoa - tupela bipo i go long De La Salle Misin Skul long Yule Ailan - tupela tu i stap long dispela seremoni.

Poto i kam long ami.



COCA-COLA AND COKE ARE REGISTERED TRADEMARKS WHICH IDENTIFY THE SAME PRODUCT OF THE COCA-COLA COMPANY.

HRME 015 6365

MILENG FAMILI TOK TENKYU

Mipela ol wanfamili bilong Bisop Stahl Mileng, mipela i laik tok tenkyu tru long ol pren na pipel i bin sori wantaim mipela na i helpim mipela long taim Bisop Mileng i bin dai.

Mipela i kalap nogut tru, mipela i pilim nogut tru long indai bilong em. Tasol long ol presen na ol beten na ol tok marimari bilong yupela ol pren, mipela i bin kisim strong. Mipela i tenkyu tru long nem bilong meri bilong Bisop, em Naning, wantaim 4-pela pikinini bilong em.

Gutpela Kristen pasin na tingting bilong yupela i bin helpim mipela tru. Mipela i pre bai yumi olgeta i ken go het nau na skruim gutpela wok bilong Bisop Mileng i go moa moa yet - bai sios na gavman, tupela wantaim i ken bhainim oltaim lo bilong Jisas Kraus.

Mipela -
J.S. Mileng, L. Mileng, D. Mileng.

BEKIM TOK BILONG MINISTA



Long Gavman

Dia Gavman mipela i laik askim.

Hia mi gat sampela wari na bai yupela inap prinim long mi long Wantok Niuspepa? Em hia ol wari bilong mi.

Watpo gavman i no inap askim mipela ol pipel insait long ol provins o wan wan sap distrik long senisim gavman? Mi ting senisim gavman em i wanpela bikpela samting insait long kantri. Moa gut long mipela pipel yet inap skelim na painimaut wanem pati i rulim kantri gut na wanem pati i no inap rulim kantri gut.

Em i no stret long ol memba bilong haus i ken senisim gavman long laik bilong ol tasol. I gutpela long ol i mas askim pipel pastaim, orait bai mipela mas vot na painim wanem pati inap kamap gavman. Mi ting olsem taim bipo mipela i bin vot long wanem pati mas kamap gavman. Orait nau tu long

taim bilong senisim gavman, mipela tu mas vot gen long painimaut wanem pati.

Mipela pipel i ting bai em i inap helpim mipela ol pipel bilong dispela kantri. So yu husat man o meri i ting ol tingting bilong mi no stret, orait bai yu ken rait i go long Wantok Niuspepa na bai mi ken lukim. Tenkyu.

Paul S. Banai,
Is Sepik

Long Mista Tago

Dia Mista Tago,

Hia mi laik autim wari bilong mi i go long gavman. Mi bin ritim Wantok Niuspepa, namba 227 na tu harim nesenel nius long 16 de bilong dispela mun Ogas. Sampela wokmanmeri bilong gavman, em long dokta na nes. Ol i wok long grisim ol pipel bilong PNG long Pasim Bel na yusim raba o kondom.

Plis dispela ol toktok i wok long kamap long gav-

man long pepa na redio i no stret long mipela ol PNG pipel. Bikos PNG i gat bikpela graun i stap nating no gat pipel na bisnis long en. Wari bilong gavman em i stap tasol long bikpela taun, na pipel long taun. Gavman i no lukluk gut long rural eria bilong PNG.

Graun na Mani - Eksampel: Lukluk long Madang Provins, graun i stap natingstat long mak bilong Morobe i go inap long mak bilong Is Sepik Provins. Insait long bus na long nambis. No gat pipel na bisnis. Na mi ting i wankain tasol long Morobe, na Wes Nu Briten, Na Wes Sepik, na Is Sepik, na Westen na Noten Provins tu.

Olsem na gavman mas lukluk gut, na yusim mani, save na graun long ol pipel bilong dispela kantri PNG. Bikpela mani gavman i save yusim tasol long ol transpot olsem long jet balus na ol narapela.

Bilong pinisim tok na wari bilong mi, mi laik gavman mas givim help long PNG pipel, husat i gat 5-pela pikinini na i go antap long 10-pela. Ol i no long bagarapim bel na yusim gumi.

Peter K. Bade,
Manam Ailan, Bogia.

Long Mista Tammur

Dia Minista Bilong Edukesen. Mi gat wanpela wari bilong mi. Mi laik tokaut long yupela ol wantok. Yes mipela planti man mi-

pela i skul long tok pisin. Em mipela inap long harim sampela wok ol man i skul long tok inglis i harim.

Mipela i kisim save olsem ol inglis skul i kisim tasol ol gavman na ol sampela dipatmen bilong gavman ol i no save lukluk long dispela samting. Olsem na ol gavman mas wokim sampela we o rot bilong pisin skul i mas harim wok wantaim inglis skul na tupela mas wok wantaim bai i gutpela. Plis tingting gut na strétim wari bilong ol man i skul long tok pisin. Mipela i gat bikpela wari long dispela sot tasol. Em tasol tok bilong mi.

Berry Okumpa,
Kimbe.

Long Misis Rooney

Dia Edita - Mi wanpela woda i stap long Bomana banis kalabus na mi laik autim liklik wari bilong mi. Wari bilong mi em i olsem. Taim ol i makim Misis Rooney long bosim Lika na Koreksenel Sevis, em i no mekim wanpela gutpela samting o mekim wanpela gutpela toktok long palamen long amamasim mipela ol woda. Long Pos Kororia na Wantok na tu long redio em save toktok planti long lika.

Sapos Rooney laik toktok planti long lika tasol, orait, watpo gavman i bungim Korektiv wantaim Lika? Mipela laikim gavman i mas givim nupela minista long bosim Korektiv. Mi bin stap longpela

taim long Bomana haus kalabus tasol Rooney i no save kam na toktok wantaim mipela ol woda na kisim ol wari bilong mipela.

Mipela i gat planti wari long tokim em tasol em i no save kam. Mipela ol woda save bel hat long em na mipela laikim gavman i mas makim wanpela nupela minista bilong mipela. Olsem na olgeta banis kalabus long olgeta hap long Papua Niugini i pundaun pinis.

Ating yupela ol rida i save pinis olsem ol kalabus man long Buimo banis kalabus long Lae i go straik long tupela taim pinis. Yupela ting em asua bilong husat? Tru yet em i bikpela asua bilong Misis Rooney, minista bilong lika na korektiv. Long wanem, em i no glvim strongpela toktok, pawa na harim wari bilong ol woda na opisa bilong Korektiv na mipela ken givim strongpela toktok na oda long ol kalabus man. Ol bai no inap long straik na biket sapos gavman na minista i amamasim ol woda long wok bilong ol.

Minista wantaim gavman i slek na ol woda tu i slek na ol kalabus man meri i strak na biket nabaut. Olsem yumi mas i gat minista bilong mipela yet na em i ken lukluk long mipela olgeta taim.

A.C.O. S. Komkal,
Bomana/Boroko.

Yu ken painim bekim bilong dispela wari long pes 19 bilong dispela Wantok.

TAMBU TORO





Poto antap i soim wanpela meri i holim pikinini i laik dai long hangre, long wanem mama i no bin givim gutpela kaikai long em. Ol misin i mekim bikpela wok wantaim ol dispela kain pikinini insait long bikbus.

Daunbilo yu lukim poto bilong wanpela haus sik long misin stesin insait long bus. Ol misin i bin wokim na i ranim wanpela provinsi haus sik, 42 helt senta, na 159 sab-helt senta, na 104 et pos. Long yia i go pinis dipatmen bilong helt i bin kisim K40,441,882 long gavman. Na bilong dispela ol misin i bin kisim K1,800,000 long ol wok helt bilong ol.

Long raithan em i Sista Marlene Long bilong katolik misin i wok insait long bikbus bilong Wes Sepik. Em i dokta tru na i lusim Amerika na i kam wok long PNG.

Klostu 100 yia nau ol misinari i kamap long nambis long Papua Niugini na i staim wok misin. Ol i laik bringim Gutnius long ol man meri pikinini hia long dispela kantri.

Long dispela taim planti waitskin i dai long sik malaria na long pekpek wara. I no gat gutpela marasin oisem nau long daunim planti sik. Na tu, ol i lukim planti manmeri na pikinini long ples i gat sik na planti i dai. Sampela lain misin - Luteran, Katolik na Yunaitet Sios (bipo ol i kolim London Misinari Sosaiti) i statim wok medikal long helpim sik bilong ol waitskin na blakskin klostu long misin.

Pastaim planti manmeri i pret long go long dispela kain dokta o nes. Tasol bihain ol i lukim marasin bilong ol em inap long helpim ol sikman, na planti i stat long go na kisim marasin bilong daunim sik.

Bihain ol misin i kirapim sampela skul na sampela man i go long lainim pasin bilong rit na rait. Wok medikal i kamap moa, na sampela dokta na nes i kisim sampela man na lainim ol long wok odeli. Ol i kolim dispela lain dokta boi. Taim pait i no kamap yet, gavman i no gat planti skul na i no gat bikpela haus sik. Tasol misin i wok long helpim ol pipel long ol liklik klinik bilong ol. Long dispela taim gavman i stap long taun na ol misin i stap long bus.

Woa i Kamap long PNG

Long taim bilong bikpela woa long taim Japan i bin kam na pait insait long Papua Niugini (1942) sampela misinari i go bek long ples, sampela i stap long PNG na helpim Australia long pait. Sampela i dai long han bilong soldia bilong Japan, na sampela i kalabus pinis. Long dispela taim sampela dokaboi i haitim sampela marasin na helpim pipel long ples. Long 1946, taim pait i pinis, ol misinari i kam bek gen na i kirapim gen misin stesin, ol skul, na wok medikal bilong ol.

Long dispela taim tu Gavman i stat long kirapim planti skul na planti haus sik na klinik na olsem wok medikal i go het.

Long dispela taim ol misin i wokabaut i go painim planti pipel long Isten Hailans, Saten Hailans, Westen Hailans, na Enga. Planti nupela misin tu i kamap long dispela taim na i go long Hailans.

Pasim Rot Bilong Sik


Long taim bipo ol dokta na nes i wet inap sik i kisim pinis wanpela man meri pikinini na i trai hat

long givim marasin long helpim em. Bihain, nupela tingting i kamap. Watpo yumi no pasim rot bai sampela sik i no ken painim ol pipel? Bilong wanem yumi wet long sik i painim ol pastaim?

Olsem na gavman i kirapim tingting long ol husat i wok medikal long go long ples na givim sut long ol pikinini long pasim rot bilong sampela sik. Na tu ol i skelim ol pikinini long lukim hevi bilong ol. Sapos pikinini i save dring susu na kaikai gutpela kaikai em i save kamap strong na sik i no save painim em kwik. Na tu sapos mama i wasim pikinini olgeta de wantaim sop, skin bilong em i stap gut.

Na wok haisin i kirap. Ol pipel i skul long putim pipel i skul long putim pekpek bilong olgeta manmeri pikinini long hul.

Na i tambu long tromoim pipia nabaut, na olsem ol lang i no kamap na bringim sik i kamap. Narapela samting, taim mama i gat bel em i go kisim marasin bilong strongim blut, na pasim rot bilong sampela sik. Olsem na pikinini i kamap strong na mama tu i stap gut.



NA OL SIOS

Gavman i givim dispela wok long ol misin o sios i go long ples na skelim pikinini, givim sut, na lainim ol long we bilong pasim sik. Ol misin o sios i gat helt senta na et pos. Sampela nes o et pos odeli bilong misin i wok insait long ol dispela. Na narapela lain i go wokabaut long lek, o long ka, o long bot o kanu, o long balus na i skelim pikinini na i skulim kain kain sik long bikbus.

Skul Bilong Nes, Nes Et na Et Pos Odeli

Long taim bipo sampela dokta na nes i lainim sampela man long wok bilong doktaboi. Long taim bikpela pait i pinis ol i statim skul gen long lainim et pos odeli, nes et na nes tu. Sampela nes i man na sampela i meri. Ol i bihainim kos bilong Gavman o Nesing Kaunsil, na bihain ol i kisim tiket bilong Gavman.

Sios Medikal Kaunsil

Long 1965 Engliken Sios i singautim sampela sios husat i mekim wok medikal na ol i bung long ples Dogura long Milne Bay, wantaim sampela bikman bilong Helt Dipatmen long statim wanpela bung. Nau

ol i kolim Sios Medikal Kaunsil. Na nau i gat 24 memba Sios o misin i mekim wok helt long olgeta provins.

Gavman i save givim mani long ol sios long helpim dispela wok, na tu ol Sios i save putim mani bilong ol insait long dispela wok medikal. Long sampela ples ol manmeri i save givim wan siling long helpim dispela wok long taim ol i kisim marasin o sindaun long haus sik. Na long sampela arapela ples i gat nupela rot ol i kolim insurens. Long olgeta provins wok medikal bilong ol Sios i aninit long Provinsal Helt Opisa.

Helt Bot long Provins

Long mun Julai Minista bilong Helt, Mista Wiwa Korowi, i tok yesa long olgeta wan wan Provins i gat bot bilong givim stia na bungim wok medikal bilong Gavman na ol Sios.

Planti pipel long ples i laikim wok medikal bilong ol sios. Bilong wanem? Ating bikos ol sista na dokta na nes na et pos odeli i stap longtaim long wanpela ples na kisim save pinis long tok ples, na i

save pasin bilong ol pipel. Na tu ol pipel i lukim ol lain misin dokta na nes i save stap longtaim. Ol i laik wok hia.

Wok i Stap Yet

Planti ples i no gat et pos yet, na i no gat nes i save kam na skelim pikinini na givim sut, helpim ol mama i gat bel, na lainim ol long pasin bilong pasim sik. Sios (na Gavman tu) i gat planti wok yet long go long bikbus na helpim ol pipel long pasim rot bilong sik, na helpim ol pipel long taim bilong sik. Ol i gat wok yet long bihainim dispela tok Jisas i bin givim yumi long Jon 13:34. Mi givim nupela lo long yupela; Yupela i mas laikim tru ol brata. Mi bin laikim yupela, na olsem tasol yupela i mas laikim ol brata."

Merla Garrett.

Poto antap long raithan i soim wanpela lepraman i no gat pinga moa. Em na man i no gat fut moa, tupela i stap long haus sik bilong misin. Klostu olgeta haus sik bilong stretim sik sepra, ol misin tasol i ranim bipo.

Daunbilo em i wanpela lain nes i winim skul. Ol misin i ranim 28 skul bilong trenim ol nes na ol et pos odeli.



Maxell Helps



Maxell bāteri i stap long olgeta hap.
Taim yu go long stua yu mas askim long Maxell tasol.
Maxell i no inap pinis kwik. Em bai i stap longtaim tru
...Maxell

Get Longlife – Get Maxell



GSH403

STORI BILONG TUMBUNA

Bilong wanem meri no go sutim abus long bus

Wanpela taim wanpela man nem bilong em Kome na meri bilong em Duma. Wanpela nait Kome i tokim Duma long i go painim sampela kaikai bilong Kome long bai em i karim i go long bus wantaim em. Orait long moning Duma i go painim kaikai bilong em. Na taim kaikai i redi em i karim i kam long Kome.

Long bik moning tru Kome i kirap i kisim spia na banara na bilum kaikai bilong em na i laik go long bus. Duma i lukimem sanap na i askim Kome, "Yu laik go we". Na meri ya i tok em i laik go wantaim man bilong em long karim bilum kaikai bilong

em. Orait tupela i go i go kamap long bikbus na Kome i lusim ol banana bilong em na i katim sampela liklik diwai bilong wokim haus.

Taim em i pinis long wokim haus em i kisim sampela kaikai na i kaikai. Taim em i pinisim kaikai em i kisim banara na i tokim meri bilong em long i stap long haus. Tasol Duma i strong moa long go wantaim Kome. Long nait tu meri i bihainim man i go long bus. Ol i go kamap long wanpela bikipela diwai i drai pinis na Kome i lukim haus bilong wanpela na i tokim Duma long wetim em i stap.

Tasol Duma i tok em i

no save lukim olsem wanem kapul i save slip na wokim haus bilong em. Na Kome i tok orait long Duma bai i go wantaim. Olsem na Kome i karim Duma tu i go antap long diwai. Ol i wok long i go antap yet na dispela kapul i senisim em yet i go kamap olsem wanpela draipela pisin.

Na em i flai i kam daun na i pulim Duma long namel bilong em na karim em i go pinis long bikbus. Na Kome i kraik nogut tru na i go bek na tokim ol manmeri long ples. Olsem na ol meri i pret na ol i no save i go long bus long painim ol pik o kapul long bikbus.



TULTUL
TITAN

12 1/2 gauge IOWA BAB WAIA

16 gauge HAI TENSAEL BAB WAIA

SAPOS HUSAT MAN I LAIK WOKIM BANIS, MIPELA LONG ARC-TITAN I GAT TUPELA GUTPELA KAIN BAB WAIA ISTAP. WANPELA I 12 1/2 GAIS IOWA BAB WAIA NA NARAPELA I 16 GAIS HAI TENSAEL BAB WAIA. TUPELA I GUTPELA NA STRONGPELA KAIN BAB WAIA LONG WOKIM BANIS PIG NA BULMAKAU.

ARC-TITAN Pty. Ltd. P.O. Box 1026, LAE. Tel. 42.3988.

Hetman bilong Ombudsman Komisn, Mista Ignatius Kilage, i bin tok save olsem: planti pipel i bin komplem long komisn bilong em na i tok, ol sampela bikpela man na lida bilong gavman i no bin bekim dinau bilong ol, na i no bin baim samting ol i bin kisim pinis long kampani o bisnis. Bipo i gat wampela stori long nius i bin tok olsem, planti bikpela man i bin baim kain kain samting o kisim dinau na ol i no bin bekim mani; na sampela i bin tok ol i no mas bekim.

Mista Kilage i tok save long ol bisnis na bisnisman olsem: ol i mas lukaut taim ol bikpela man i kam na i laik kisim dinau long ol, o ol i laik kisim samting na baim bihain tasol.

Em i tok save olsem: Lidasip Lo i tok ol dispela bikpela opisa na lida na man i ken kisim dinau long ol beng na seving na lon sosaiti tasol. I tambu long ol long kisim dinau long sampela arapela lain pipel, o long wan wan manmeri. Sapos ol i mekim olsem, ol lida i brukim lo na inap long Ombudsman Komisn i ken kotim ol. Sapos lida i laik kisim dinau long ol man baim nating o kain kain bisnis, em i mas kisim tok orait long Ombudsman komisn pastaim.

Ombudsman Komisn i tok, i luk olsem planti bisnisman i no bin save, sapos ol i helpim ol lida olsem, ol i helpim ol long brukim lidasip lo.



FANTA IS A REGISTERED TRADEMARK OF THE COCA-COLA COMPANY. HRME 015 6366

Long dispela taim 6-pela tokman bilong 6-pela dipatmen bilong gavman, na 2-pela bilong provinsal gavman bilong Manus i stap long Amerika na i toktok wantaim ol hetman bilong Star-Kist Fishing Kampani, long wanem dispela kampani i laik wokim wampela faktori bilong wokim tin pis long Lombrum long Manus Ailan.

Inap 2-pela yia nau dispela kampani i bin toktok wantaim ol bikman bilong PNG bilong statim dispela wok. Na sapos ol dispela man bilong PNG bai stretim tok wantaim ol, bai kampani ya i wokim kontrak long dispela yia yet long kirapim wok.

Sapos dispela wok i stat, bai em i helpim ol pipel bilong Manus ailan long wok na mani. . . Tupela memba bilong provinsal gavman i lukaut gut bai dispela kampani na wok bilong em i no ken bagarapim wara nabaut long Lombrum. Na inap 2-pela yia stret dispela kampani i bin raun na traim painim gutpela ples bilong wokim tin pis faktori. . . na ol i bin painim Lombrum i win tru.

Mista Julius Chan, Minista bilong Praimeri Indastri, i bin tok olsem, sampela tok Misis Nahau Rooney i Minista bilong ol Korektiv, i bin mekim long dispela tin pis faktori i no tru na i no stret. I luk olsem Misis Rooney i ting Esian Developmen Beng tu i laik statim wampela tin pis faktori. Tasol Mista Chan i tok olsem: Esian Developmen Beng i no ting long tin pis faktori. Em i laik mekim planti arapela kain wok bilong poromanim dispela kain wok.

Esian Developmen Beng i laik i ting long mekim ol dispela wok:

- (a) wokim wampela pasis we ol sip i go lukautim ol atun lonf biksolwara i ken kam insait hait. Wokim bris na bikpela bakstua i gat bikpela frisa bilong putim ol pis.
- (b) baim samting olsem 10-pela spesel sip bilong ran long biksolwara na painim ol atun; bai ol inap wokim dispela sip long PNG yet.
- (c) wokim wampela draidok bilong wokim na fiksime ol dispela sip.

Wok bilong Star-Kist na bilong Esian Developmen Beng tupela wantaim inap winim planti mani bilong dispela kantri.

YUT WOK


Man bipo i stap Presiden bilong Port Moresby Luteran Yut, Mista Mike Mapusia, i bin sapotim askim bilong Minista bilong Hom Afeas long ol sios i mas wok wantaim long mekim wok bilong yut. Na tu long wok bilong sosal na komyuniti developmen long kantri.

Em i tok tu olsem, i lukim olsem nau ol yut i wok long kamap lida long dispela kantri. Olsem na em i gutpela long ol sios i helpim gavman long wok bilong yut long mekim PNG i kamap strongpela kantri.

Gavman i bin statim pinis wok bilong yut, tasol ol i wet long ol sios i sambai na helpim ol.

OL SIGARET

Nau manmeri i baim bikpela paket sigaret i mas peim 2t moa; na man i baim smolpela paket i mas tromoim 1t moa. Dispela em i nupela takis gavman i bin putim antap long ol sigaret. . . . Ol kampani i wokim sigaret i mas bungim dispela ekstra mani na salim i go long gavman, na bihain gavman i tilim long wan wan provins. . . bihain em i save pinis hamas sigaret ol pipel long wan wan provins i bin baim.




Poto antap i soim ol bun bilong wanpela bas, em ol i wokim long Port Moresby yet. Ol i baim ensin tasol wantaim bun bilong holim wil samting. Na haus bilong bas ol man bilong Moresby yet i wokim. Hia yu lukim ol bun tasol bilong bas ol i weldim na sodaim. Na ol windo na sia na kapa bai ol i baim na wokim long Moresby.



Poto antap i soim tupela man bilong P en T bilong Papua Niugini i kisim trening inap long 6-pela wik long ranim olkain telipon masin. Long lephan em i Dennis O'Flynn, na Herbert Ikilik bilong Port Moresby, na Leo Sambar bilong Lae.

Gavman bilong Australia i baim rot na stadi bilong tupela.

Poto i kam long Australian Information Service. Peter Kelly i kisim.




Tupela poto hia i soim wanpela paia i bin kukim wanpela lain stua long Maun Hagen sampela mun bipo. Long yia i go pas, ol i bin gat tupela bikpela paia long Maun Hagen. I no gat wara inap long Hagen bilong mekim dai paia olsem. Yu lukim ol man i traim traim long baket wara tasol.



Dispela haus bai stap olsem tasol inap planti yia moa, long wanem, ol anis i no inap kaikai Hardiflex faibro.

Hardiflex simen faibro i no save krungut, i no save sting, na i no save bruk isi, na yu no mas pentim.

Hardiflex faibro em i isi long yusim, i luk nais, na i no kostim planti mani. Em i samting tru bilong wokim olkain gutpela haus long Papua Niugini.



JH **HARDIFLEX**
building board.

Burns Philp (NG) Ltd. All Branches Steamships Trading Co. Ltd. All Branches Carpenters Hardware, Port Moresby New Guinea Co. Ltd. All Branches Gabriel Chow Sing Yip & Co. Rabaul, Bowmans (PNG) Pty. Ltd. Port Moresby & Lae. Bowmans Bodeco - Kieta

WIN LONG STRONG

Massey Ferguson Trakta — i win long strong bilong em long olgeta hap bilong graun.

Long 182 kantri bilong graun, ol saveman i baim Massey-Ferguson trakta. Watpo? Bikos ol i save pinis, dispela kain trakta i redi oltaim long mekim strongpela wok. Em i save wok hat tru, na em i isi long lukautim. I gat planti kain kain trakta, bilong olkain bikpela na smolpela wok.



Sapos yu tingting long baim wanpela trakta, mobeta yu go long Ela Motors long hap bilong yu na yu yet yu draivim na traिम dispela Massey-Ferguson trakta pastaim. Ating bai yu pilim em i samting tru.

Yu wari long ol spea pat? Yu wari long mekenik bilong fiksim? Yu no ken wari. Olgeta bisnisman bilong PNG i save pinis, Ela Motors i win long dispela kain wok bilong lukautim olgeta ka na trak na trakta em i salim.



ELA MOTORS LIMITED

Wheels for the nation

PT. MORESBY 254088	MT. HAGEN 521888	RABAUL 921988	WEWAK 862255
LAE 422322	MADANG 822188	KIETA 956083	KIMBE 935115

GSEM 18

ASKIM NA BEKIM

GRIS LONG TELIPON

Dia Edita - Mi save lukim planti wokman bilong Pawa na Pen T ol save lukim olsem ol meri i save wok long haus. Na ol i save i go tok giaman olsem, samting i bagarap long dispela haus. Ol i giaman na i go insait long haus na lukim telipon namba. Na bihain ol i ring i go bek na grisim dispela meri olsem na planti man i save pulim maritmeri bilong narapela man.

Na tu grisim ol yangpela meri na kisim ol i go, na givim bia long ol, na mekim pasin pamuk long ol. Na olsem planti meri bilong PNG i save i go paul nabaut.

K. Paul Jambe,
Port Moresby.

BEKIM

Dia K. Paul Jambe,

Sapos man o meri i ring long telipon na i gris long yu na yu no laikim tok bilong em, yu gat wangepa isi we tru long pinisim tok bilong em. Yu hangamapim bek telipon tasol, na dispela i pasim maus bilong em tru. Planti taim tumas ol boi i ring na i gris long ol meri long telipon, na meri i no laik, tasol em i pret long hangamapim bek telipon. Pret long wanem? Em i longlong long toktok long man yu no save olgeta long em.

WOA

Dia Edita - Mi gat tok long bekim tok bilong Minista bilong Difens, Mista Louis Mona. Em i tok sampela man i laik bai Australia na Amerika na Japan i mas bekim bek mani long ol samting Papua Niugini pipel ol i lusim long taim bilong woa.

Orait, Mona, mi laik askim yu wangepa askim olsem. Dispela bikpela pait em pait bilong Papua Niugini? O Australia? O Amerika? O Japan, o bilong wanem hap? Yu mas bekim dispela askim bilong mi okei.

Namba tu tok bilong mi i go olsem, Louis Mona i tok sapos ol i strong long dispela samting bai ol i painim sampela trabel na mi laik askim olsem wanem kain trabel?

Na tu yu tok long wanem Australia tu i ken singaut long pe na bekim 8401 soldia bilong em i bin givim laip bilong sevim PNG. Na samting olsem 60,000 soldia i bin kisim bagarap na i ken singaut long bekim na Minista i tok.

Bihain long pait Australia i bin givim K200 milion kina long gavman bilong mipela olsem samting i bagarap long pait. Minista i tok, Australia i save givim samting olsem K200 milion kina long yia.

Ol dispela tripela kantri ol i laik pait long samting bilong ol, na watpo ol i kam long yumi Papua Niugini? Ol i lusim hap bilong ol na ol i kam pait long rabis ples PNG na ol i bagarapim ol samting bilong PNG long pait olsem na ol i toktok planti.

Gabriel Gim,
Kimbe/W.N.B.P.

BEKIM

Dia Gabriel,

Yu wangepa soldia i bin pait long woa i raitim dispela pas. Tasol i luk olsem yu no save tru long as bilong woa long PNG.

Pren, ol Australia na ol Amerika i bin lusim ples bilong ol na i bin kam pait long kantri bilong yumi PNG, bikos narapela kantri i bin kam insait i laik tekewe dispela kantri long yu, na kisim bilong em yet. Em tasol. Ol Japan i bin kam i laik stilim PNG long yu.

Sapos ol Australia na ol Amerika i no bin kam long lusim bikpela mani na lusim planti man moa long rausim long Japan long dispela kantri bilong yumi PNG, tude yu stap aninit long ol Japan. Tude PNG i kantri bilong ol. Na yu no gat tok moa. Yu lus pinis; yu boi bilong ol.

Tasol bikos ol Australia na ol Amerika i gutpren bilong yu, ol i lusim ples na i kam. Sapos ol i kam

long helpim yu, yu mas baim ol. Ol i no mas baim yu. Ol i no bin kisim wangepa samting long dispela kantri. Nogat. Ol i lusim planti samting. Na ol samting i bagarap long taim bilong woa, em i pasin bilong woa.

Harim! Long olgeta wan wan lokal man bilong PNG i lusim laip long dispela woka bilong helpim Papua Niugini, i gat 20 waitman i lusim laip. Yu no bin peim planti long kisim bek dispela kantri. Ol i bin peim planti. Nogat yu lusim ting long dispela samting.

Yes, yu soldia, yu bin mekim bikpela wok. Tasol ol i bin mekim bikpela moa. Sapos ol i no bin mekim bikpela wok, sapos planti wantok na wanskin bilong ol i no bin dai, tude yu no gat kantri bilong yu. Wataim bai yu bekim long ol? Wataim bai yu tenkyu long ol?

ASKIM

Dia Wantok,

Mi bin lukim tupela pas olsem leta i go long yupela long Wantok, namba 232, 19 Ogas, 1978. Tupela leta i bekim tok long Minista Tago long pasim bel bilong meri na rausim bol bilong man. Mi longlong planti long tupela leta i kam long Bill Ramu na Charles Wapa. Ating tingting bilong tupela em i no stret.

BEKIM

Tupela i tok long gavman i laik katim na rausim bol bilong man. GAVMAN I NO TOK OLSEM TRU. Gavman i tok sapos yu gat planti pikinini na em i hatwok long lukautim na givim kaikai. Orait, sapos yu no laikim pikinini moa yet i kamap, yu ken i go long haus sik na askim dokta long wokim liklik samting long yu, long pasim liklik rot i save karim man kiau i kam long bol. I no katim na rausim bol bilong man.

Nogat tru. Dispela ol dokta i wokim ol i kolim VASEKTOMI. Vasektomi em i no samting bilong

rausim strong bilong man. Sampela pren bilong mi i gat vasektomi na ol i save pilai wantaim meri bilong ol. Na bol bilong ol i stap yet.. Tenkyu tru.

Martin Simon,
Unitech, Lae.

ASKIM

Mi gat wangepa askim na mi laikim sampela smatman - olsem ol Yunivesiti studen - i bekim dispela tok na wari bilong mi.

Olsem wanem na sapos wangepa wantok i spak na i laik mekim rong o bagarapim narapela man o kirapim pait o draivim ka na kilim planti man. . . i no gat wangepa poroman bilong em i laik stapim em? Mi laikim planti taim. Ol poroman bilong em i sanap na lukim na lap tasol, na ol i larim em i mekim longlong samting. . na ol i no pasim rot bilong em. Nogat. Ol i save pinis em i spak, em i longlong long dring. . em i mekim pasin bilong longlong man. Tasol nogat. . ol i larim em.

Mi ting ol poroman i mekim olsem, ol yet i longlong moa yet. Watpo ol i no pasim spakman? Watpo ol i larim em i go pinisim laik bilong em. . . long kkilim narapela man, o bagarapim wangepa samting, o kirapim bikpela trabel?

Nogat sampela smatpela man i bekim tok olsem: taim man i spak em i no gat asua long ol samting em i mekim. . . long wanem em i longlong. Olsem, maski, larim em i mekim. Tru, a??????

Em i bikpela giaman bilong yu, smatman. Yu yet yu no bilipim dispela tok. Yu harim. Sapos dispela spakman i kirap draivim ka na i kilim sampela wanelain bilong yu, wantu, yu kilim em. Na sapos em i no gat asua, olsem yu tok, bilong wanem yu kilim em? Nau yu tok. Mi laik harim ansa bilong yu.

Julius Dekawa,
Ambum, Enga

BEKIM WE

?

BEKIM BILONG MISIS ROONEY

Dispela em i no wangepa pas i bin kam long Misis Rooney. Nogat. Em i wangepa nius ripot tasol. Tasol em i bekim tok na givim ansa long wari bilong woda i bin raitim pas mipela i bin printim long pes 11 bilong dispela niuspepa.


Minista bilong Korektiv Institusen Sevis na Lika Laisensing, i tok olsem Dipatmen bilong em nau i gat komiti bilong lukluk insait long olgeta wok bilong Korektiv Institusen Sevis.

Em i namba wan taim ol i kirapim dispela komiti bihain long tupela ten yia i go pinis. Em hia nem bilong ol man i stap insait long dispela komiti.

Joe Apau, Siaman na opisa bilong trening; N. Ososo, Opisa bilong bosim Bomanan haus kalabus; Pater K. Murphy, Saplin, na S. Gion, Het Dokta bilong Pablik Sevis Komisin, Mista V. Navuru, Seketeri bilong Sentral Provinsal Gavman; P. Luben, loman bilong Lo Dipatmen; na Misis R. Lynch, opisa bilong bosim ol spesel wok wantaim Nesenel Plening Bot.

Komiti ya bai lukluk long wanem samting bai ol i mekim long ol man i brukim lo long Papua Niugini. Na tu lukim sindaun bilong ol woda plis, na tu bai ol i mekim wanem long ol nupela opisa long taim ol i pinisim trening. Lukluk tu long sindaun bilong ol kalabus, i gutpela o nogat?

Bihain long sampela mun komiti ya bai lukluk raun long olgeta Korektiv Institusen. Na sapos wanem ol woda plis, o kalabus, na ol ausait man i laik save wataim bai ol i kam, ol bai inap harim ol redio stesin.



Tupela dok i ranim wanpela pusi. Tasol tupela pusi moa i hait i stap. We?

OL LOKAL GAVMAN KAUNSI KIBUNG

(i kam long pes 3)

Wanpela wari i bin kamap long kibung. Ol deliget i laik bai man i bin stap kaunsi planti yia moa na i pinisitaim, em i mas kisim liv pe - i olsem hap pe olgeta fotnait o olgeta mun inap em i dai. Man i bosim miting i tok olsem: gavman i no bin tingting yet long dispela samting. Na i gat planti askim pastaim long dispela samting: husat bai givim mani long dispela samting? Ol kaunsi yet i mas putim sampela mani insait, long taim ol i stap wok yet? Husat bai bosim dispela wok bilong kaunsi? I gat kain kain kaunsi i kisim kain kain pe. Wanem samting bai skel bilong pe? Na wanem samting long ol kaunsi i holim wok kaunsi sampela taim tasol na i no olsem bikwok tru bilong ol?

Wanpela man, Mista John G. Nilan, i bin givim wanpela gutpela ripot tru bilong Lokal Gavman Asosiesen Ejensi na Sevis. I olsem, inap sampela yia nau dispela Ejensi i bin baim



olkain samting wan wan kaunsi i mas i gat, na i bin sevim bikpela mani olsem. Insait long yia i go pinis dispela kampani i bin baim ol samting bilong ol kaunsi, inap long K693,140.00. Dispela ejensi i helpim ol kaunsi long yusim gut tru ol Rural Impruvmen mani ol i save kisim long gavman, long wanem, dispela ejensi i ken baim olkain samting long prais i daun-bilo tru. Na tu, dispela ejensi i save givim dinau long ol kaunsi. Nau tasol ol kaunsi i gat samting olsem K17,000 dinau ol i mas bekim long dispela Lokal Gavman Asosiesen ejensi.

Long PNG gude i gat 63 Lokal Gavman Kaunsi na ol i gat moa olsem 4,300 memba long ol.

Minista bilong Jastis, Mista Delba Biri, i tok olsem: gavman i ting long givim ol pawa bilong ol viles kot i go long han bilong ol provinsal gavman. Olsem i no samting bilong nesnel gavman long givim mani bilong baim ka o trak samting bilong karkarim ol memba bilong viles kot. Em i samting bilong lokal gavman kaunsi.

Minista bilong Hom Afeas, Mista Pato Kakarya i tok olsem: Mi sori long lukim strongpela dring i olsem meta bilong metaim na skelim strong o biknem bilong man. Man i ken dring planti, em i bikpela man. Man i ken wokim pati we i gat planti dring, em i win tru na nem bilong em i go antap. Sori. Ating tude yumi no inap moa long wokim wanpela pati i no gat strongpela dring long en, pati we yumi sindaun toktok na gris na kaikai tasol. . na i no spak.

Minista bilong Foren Afeas, Mista Ebia Olewale i tok olsem: Insait long tripela yia bilong independens bilong PNG, yumi bin kamap gutpren wantaim 45 kantri bilong graun. Na long planti dispela kantri yumi gat gavman opis. Pe bilong olgeta opisa bilong PNG i wok longwe long ol ausait kantri, em inap long K2,182,406.

OL MEMBA KISIM MOA PE NAU

Bipo wan wan memba bilong palamen i bin kisim K5500 long wanpela yia. Em inap long moa olsem K200 long wan potnait. Nau em i stat long kisim K6541 long wan yia. Em i min moa olsem K250 long wan wan potnait. Na wan wan memba i bilong Port Moresby na i kam long kibung bilong palamen, em bai kisim K15 long wan wan de bilong baim kaikai bilong em, sapos em i stap long hostel bilong gavman. Na sapos em yet i lukaut long haus bilong em, em bai kisim K28 long warr wan bilong baim kaikai samting. Na tu taim em i stap long Moresby em i gat bikpela ka bilong em.

PRE BILONG WANPELA PAPA

God Papa bilong mi, yu bin mekim mi kamap papa bilong dispela famili bilong mi. Mi amamas tru long dispela meri yu bin givim mi. Mi lukim ol pikinini tu yu bin givim long mitupela, Na bai bilong mi i hepi tumas.

Plis, lukaut gut long famili bilong mi i stap long dispela haus mi bin mekim long ol. Stiaim wok bilong mitupela papamama, bai gutpasin bilong mitupela i soim rot i stret long ol pikinini. Nogut mitupela i skulim ol long maus tasol na pasin bilong mitupela i arakain.

Mekim famili bilong mipela i stap gutpela tru olsem famili bilong Josep na Maria na Jisas long Nasaret.

Johnson Autbot Moto Strongpela na inap ran longpela taim Maski yu wok o yu limlimbur tasol



I GAT OLGETA KAIN SAIS BILONG DISPELA MOTO: 6 HOSPAWA NA 15 NA 25 NA 35 NA 40. MIPELA I GAT MEKENIK NA SPEA PAT TU.

KISIM LONG OL STUA I MAKIM MIPELA LONG MANUS, KAVIENG, BUKA, KIMBE, KIUNGA, NA TU LONG "STEAMSHIPS" LONG SAMARAI, POPONDETTA, LAE, MADANG, VANIMO, RABAU, KIETA, NA GOROKA.

Johnson

Steamships - MACHINERY
STEAMSHIPS TRADING COMPANY LIMITED

GSSM06

PAS I KAM LONG OL PIPEL

NO LAIKIM STRING BEN

Dia Edita - Nau mi laik bekim pas bilong brata Valentine Yaman. Yes brata yu bin tok olsem. Insait long ples wan wan o viles nambaut ol kaunsil na komiti i wok long rausim string ben. Na yu bin krosim ol kaunsil na komiti. Na yu bin tok olsem, string ben em i samting tru o namba wan samting bilong mekim ol yangpela man na meri i amamas na bung wantaim.

Tasol brata, mi laik tokim yu olsem. Dispela samting olsem paitim string ben na wokim sosol nait na danis nambaut. Em i no gutpela samting tru. Pren, mi laik tokim yu olsem dispela samting em i as tru bilong yangpela man na meri i save skirap na pamuk nambaut. Ol yangpela meri i no marit yet na insait long dispela string ben o sosol nait na danis ol i save i gat bel kwik.

Olsem na pren, mi amamas tru long ol komiti na kaunsil i rausim ol dispela samting. Olsem na brata mi tokim yu. Yu no inap helpim wampela samting bilong dispela graun bilong stopim ol yangpela i no ken raskol nambaut long taun. Nogat tru. Rot tru ol yangpela i mas go long lotu na harim tok bilong God long buk Baibel.

Em tasol wari bilong mi long bekim pas bilong yu. Tasol sapos yu kros long pas bilong mi, orait, rait tasol i go long Wantok Niuspepa na mi ken lukim. Em tasol na tenkyu.

Joseph Nambis Boi,
Banz/W.H.P.

JOINIM AMI

Dia Edita - Mi gat wampela wari hia na mi laik bai yupela prinim long Wantok Niuspepa. Wari bilong mi i go olsem, Gavman bilong yumi PNG i mas kisim planti man long joinim Ami. Long nau yet yumi no gat planti ami long kantri. Mi laikim bai yumi mas i gat 5,000 ami o moa.

I gat planti ol manki i pinisim standet 6 na standet 8 na 10 pinis na i stap nating. Ol yet i laik joinim ami long helpim kantri bilong ol tasol gavman bilong yumi i no laikim. Mi laik tok olsem gavman na ol bikman bilong dispela kantri, yupela i no ken tingting long wok bisnis tasol.

Plis nau mi tokim yupela wok bisnis na narapela samting i no inap tru long strongim dispela kantri. I taim nau yumi mas i gat bikpela ami na stat prektisim ol nau. Ol bikman, opim ai bilong yupela na lukim wanem samting nau i wok long kamap long boda.

Wanpela samting sapos yupela kisim mipela long joinim ami. Bai stil na raskal pasin i no inap kamap bikpela long kantri. Miting ol i stap nating na save mekim olsem. I taim nau na gavman mas lukluk long dispela.

Em tasol liklik wari bilong mi. Sapos yu husat man o meri i laik bekim o skruim pas bilong mi, em i orait tasol. Tenkyu.

Remson G. Winuwor,
Lae.

SLIP AUSAIT

Dia Edita - Inap yu givim liklik spes long mi long putim liklik wari bilong mi hia long Wantok Niuspepa. Yes wari bilong mi i go olsem. Long Madang mi lukim planti manmeri na ol pikinini bilong ol wantaim ol i save i kam slip arere Saina stua long maket.

Ol save slip ausait long pablik ples na ol man husat i save wokabaut long pablik rot i go i kam save lukim ol na i no stret. Mi yet tu mi bin lukim planti taim long olgeta Fraide. Na em i no gutpela long mi.

Mi yet mi gat bikpela sori tru long ol papamama, na bratasusa bilong mi husat i save slip ausait, arere long Saina stua. Olsem wanem long yupela ol Madang Taun Kaunsil. Yupela i gat ai na het bilong yupela long lukluk na tingting na wokim samting long ol pipel bilong yupela.

Yupela save kisim K10 long Kaunsil takis long ol man long ples. Wan wan man em i save baim. Yupela tingim dispela. Ol i save i kam long Fraide na salim kaikai bilong ol long maket. Na sampela ol baim na sampela ol i no baim long en, em ol i save putim na slip na neks moning long Sarere ol i save salim gen ol kaikai bilong ol.

Ol save kisim mani long kaikai ol i salim na spentim liklik long sop, kaikai na sampela long bilas bilong ol na hap ol i save tingting long takis na ol save putim liklik long haus. Taim yupela i kam long kisim takis long ol. Ol i save givim yupela isi.

Olsem na yupela ol kaunsil mas tingim dispela na wokim wampela haus bilong ol arere long taun na ol i ken kam slip long Fraide na long Sarere. Ol i go bek long ples bilong ol long taim ol i pinis long salim kaikai bilong ol.

Em tasol liklik wari bilong mi na yu husat man i laik bekim pas bilong mi, orait, rait tasol i go long Wantok Niuspepa na mi ken lukim. Tenkyu.

Kid T.G. Gotinapo,
Madang.

TAMBU LONG AMI BAREKS

Dia Edita - Yes mi laik sapatim tok bilong Mista G. Sumbukaba eks ami

long Lae. Dispela brata ya i raitim gutpela pas tru.

Yes mi laik gavman bilong yumi i mas lukluk gut long dispela lo. Sapos ol spotman bilong arapela kantri i kam long PNG. Orait ol i no ken slip long Ami Bareks. Ol i mas i go slip long hotel, haiskul, na ol koles. I no long ami bareks.

Nogut ol arapela kantri i luksave o luk stil long banis bilong yumi we ol ami i save lukautim. Na bai ol i kam stret na bagarapim kantri bilong yumi. Yumi save ami em i olsem banis tru bilong yumi PNG. Ami bareks i no haus pasindia. Tenkyu.

Sapos husat brata i gat tok plis, rait tasol long Wantok Niuspepa. Mi hepi tasol long lukim.

Sep Seliko,
Lae.



KAUNSI TAKIS GO WE?

Dia Edita - Mi laikim yupela putim dispela wari bilong mi i go long Wantok Niuspepa. Yes mi bin stat

peim kaunsil takis long yia 1967 i kam inap 1978 nau.

Long Kabwum Sap Provins i gat 38 tausen manmeri na mipela baim takis i go inap hamas mani i save kamap long wampela yia. Mipela pipel bilong Kabwum i longlong tru long dispela mani.

Insait long 12-pela yia i no gat namba bilong dispela mani i kamap na ol pipel i ken luksave. Tingting kranksi bilong ol pipel i luk olsem. Ating dispela mani em kaunsil presiden na klak ol yet i kaikaim nating.

Long wanem populesen bilong Kabwum Sap Provins i winim arapela manmeri bilong Morobe. Pipel i harim nius bilong arapela sap provins na bel slek long baim takis mani. Long wanem presiden na klak i no wokim gut baset bilong mani. Ol kaunsila na presiden ol i no save tok pisin na ol i go kibung na pasim maus na lukluk long husat klak o presiden i toktok. Ol i bilong tok yes tasol.

Na no gat wampela bilong ol i tok nogat. Dispela kain pasin na mani i pinis nating long namel bilong kaunsil na presiden na klak.

Yes kristen brata long olgeta hap long arapela provins long PNG. Husat i ken kliaim tingting bilong mi long wok bilong kaunsil takis mani i wok o ran olsem wanem. Plis bekim stret long Wantok Nius.

Uyong Kebly,
Arawa/N.S.P.

BAIM WANTOK

Sapos yu laik kisim Wantok niuspepa inap long wan yia (em i olsem 48 taims), yu katim dispela tiket long sisis na yu salim i kam long mipela wantaim K8.00.

Nem bilong yu.....

Adres bilong yu.....

Salim sek o mani oda inap long K8 wantaim tiket i kam long :

WANTOK BOX 1982 BOROKO

Sapos yu bilong wampela skul o misin o klap o grup na yu laik kisim moa olsem 10-pela Wantok olgeta wik, orait, yu rait i kam long mipela na mipela i gat spesel prais long dispela kain samting.

Prais bilong go long Australia: K14.50 na long Amerika na Yurop long sip em i K18.20 na long balus em i K24.00.




Kirap long lephan yu lukim Mista Thomas Korken (em i wok long opis bilong didiman bilong Kundiawa, Mista Paul Onga (wanpela ekstensen opisa wantaim dipatmen bilong indastri long Wabag); saveman na tisa bilong ol: Mista Richard Gardner, na Mista George Kittika rural developmen opisa bilong Maun Hagen). Ol i stap insait long wanpela spesel grinhaus long Melbourne.

Ol i skul long wanpela kos wantaim 21 arapela saveman bilong wok gaden na wok didiman, ol i bin kam long 15 kantri.

Gayman bilong Australia i bin baim rot na skul bilong ol.

Australian Information Service Foto. Patrick McArdell i kisim.

Laik baim Kapa? Askim ol long Zincalume Kapa tasol!



**Zincalume em i wanpela kain kapa i no save ros o bagarup kwik.
Sapos yu laik wokim haus askim ol long dispela
kain kapa tasol.**

 John Lysaght (PNG) Pty Limited

LAE: P.O. Box 872, Tel. 421866 PORT MORESBY: P.O. Box 5978, Boroko Tel 253119 RABAU: P.O. Box 62, Tel 921044

GSL02

OL TESTAMEN STORI

Bokis
Kontrak
Bilong
God

1 Samyuel
3:18 - 5:2



HETPRIS BILONG ISREL, ILAI, EM I SAVE GOD I BIN GIVIM TOK LONG SAMYUEL. TASOL SAMYUEL I NO LAIK TOKAUT LONG ILAI. ILAI TASOL I STRONG LONG SAMYUEL I TOKIM EM.

GOD I TOK OLSEM, OL PIKININI BILONG YU ILAI, OL I MAN NOGUT, NA YU NO BIN STAPIM OL. OLSEM NA BAI GOD I MEKIM SAVE LONG OL LONG PASIN NOGUT BILONG OL.

BIKPELA BAI I MEKIM STREPELA PASIN TASOL.

OL MAN I HARIM TOK LONG GOD I BIN GIVIM TOK LONG SAMYUEL, NA TAIM SAMYUEL I KAMAP BIKPELA OLGETA ISREL I SAVE EM I PROFET BILONG GOD.

WANPELA TAIM OL FILISTIA I KAM PAIT WANTAIM OL ISREL, NA PAIT I KAMAP STRONG TUMAS, NA OL FILISTIA I WINIM ISREL.



SAPOS OL PRIS OL I MAN BILONG GOD OLSEM SAMYUEL, BAI I GUTPELA TRU. TUPELA PIKININI BILONG ILAI I SAVE MEKIM PASIN NOGUT LONG YUMI.

HARIM GUT. TUPELA I MEKIM

OLSEM NA BAI GOD I BAGARAPIM TUPELA.



OLAMAN, 4,000 MAN I DAI PINIS.

NAU BAI YUMI MEKIM WANEM?

Used by permission of the David C. Cook Foundation. Copyright 1973, David C. Cook Publishing Co. All rights reserved.

WANTOK SPOT PES



Yu inap painim wantok bilong yu?

Poto long lephan i soim sampela pilaiman bilong Ragbi Lig gem, Klas A., Long dispela taim Abau i pilai egens long Hanuabada Hawks long ples pilai long Waigani.

Kirap long lephan em: Ako Thomas, Pouna Vagi, Gavera Seri, Joe Ae.

Poto daunbilo i soim Mista John Wagambi, em i kepten bilong PNG Ragbi tim. Em i bosim tim i bin go pilai long Nu Silan na em i kisim namba wan nem olsem "best and fairest" bilong olgeta man long bikpela pilai ol i kolim Pasifik Kap Turnamen. Hia long Papua Niugini ol PNG i pilai egens long Frans na i winim ol. John em i bilong Hawain, i no longwe long Wewak long Is Sepik. Em i marit long Sen Josep Sios long Boroko. Nem pilong meri bilong em Julie Givere, na em i bilong Noten Provins.

Veronica Williams Poto.

